



## Kuumbwa Upya

**W**ala msiifuatishe namna ya dunia hii; bali mgeuzwe kwa kufanywa upya nia zenu, mpate kujua hakika mapenzi ya Mungu yaliyo mema, ya kumpendeza, na ukamilifu.—**Warumi 12:2.**

Kristo alikufa msalabani ili aiokoe dunia isiangamie katika dhambi. Yeye anataka ushirikiano wako katika kazi hii. Unapaswa kuwa mkono Wake unaosaidia. Kwa juhudi ya dhiti na isiyo na kuchoka, unapaswa kutafuta ili kukoa waliopotea. Kumbuka kuwa ilikuwa ni dhambi zako zilizosababisha msalaba kuwa wa lazima. Ulipomkubali Kristo kama Mwokozi wako, uliapa kushirikiana naye kubeba msalaba. Kwa uzima na kwa mauti umeunganishwa naye, sehemu ya mpango mkubwa wa ukombozi.

Nguvu ibadilishayo ya neema ya Kristo humshikilia yeye anayejitoa kwa ajili ya utumishi wa Mungu. Akiwa amejazwa Roho ya Mkombozi, anakuwa tayari kujikana mwenyewe, tayari kuubeba msalaba, tayari kufanya kafara yoyote kwa ajili ya Bwana. Hawezi tena kuwa mtu asiyejali roho zinapopotea kumzunguka. Anakuwa ameinuliwa juu zaidi ya kujijali mwenyewe. Ameumbwa upya katika Kristo, na kujitumikia mwenyewe hakuna nafasi katika maisha yake. Anatambua kuwa kila sehemu ya mwili wake ni mali ya Kristo, ambaye amemkomboa kutoka kwenye utumwa wa dhambi; kwamba kila muda wa siku zake zijazo umenunuliwa kwa damu ya thamani ya Mwana pekee wa Mungu.

Je, unathamini kwa kina dhabihu iliyotolewa Kalvari kiasi kwamba uko tayari kufanya jambo lingine lolote kuwa la pili baada ya kazi ya kuokoa roho? Shauku ile ile ya kuokoa wenye dhambi ambayo ilimbainisha Mwokozi inabainisha maisha ya mfuasi wake wa kweli. Mkristo huyu anakuwa hana tamaa ya kuishi kwa ajili ya nafsi yake. Anapenda kujitoa kwa ajili ya huduma ya Bwana. Anasongwa na shauku isiyoweza kuelezeka ya kuleta roho kwa Kristo...

Nawezaje kumtukuza kwa ubora zaidi, Yeye ambaye ni wangu kwa uumbaji na kwa ukombozi? Hili ndilo swali tunalopaswa kujiuliza. Akiwa na dukuduku ya kutaka kusaidia, yule ambaye ameongoka kwelikweli huwa anatafuta kuwaokoa wale ambao bado wapo chini ya nguvu za Shetani. Anakataa kufanya chochote kitakachomzuia katika kazi yake. Ikiwa ana watoto, anatambua kuwa kazi yake inapaswa kuanzia katika familia yake mwenyewe. Watoto wake ni wa thamani kubwa kwake. Akikumbuka kuwa wao ni wanachama wachanga wa familia ya Bwana, anajitahidi kwa nguvu zake zote kuwaweka mahali ambapo watasimama upande wa Bwana. Ameahidi kumtumikia, kumheshimu na kumtii Kristo; na anajitahidi kwa uvumilivu usio na kuchoka kuwafundisha watoto wake ili kamwe wasiwe na uadui na Mwokozi.

Kwa baba na mama, Mungu ameweka jukumu la kuwaokoa watoto wao kutoka kwa nguvu za adui. Hii ni kazi yao, kazi ambayo hawapaswi kamwe kuiacha. Wale wazazi ambao wana uhusiano wa moja kwa moja na Kristo hawatapumzika hadi watakapoona watoto wao wakiwa salama ndani ya kundi. Watafanya hili kuwa mzigo wa maisha yao (Testimonies For The Church 7:9-11).